

Služba za reviziju finansijskog poslovanja

Na osnovu člana 14. stav 1. Zakona o finansiranju političkih stranaka («Službeni glasnik BiH» broj 22/00) i člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) izdajem

**IZVJEŠTAJ O REVIZIJI
GODIŠNJEG FINANSIJSKOG IZVJEŠTAJA ZA 2005. GODINU
EVROPSKE EKOLOŠKE STRANKE**

Broj: 09-07-6-1020/07

Sarajevo, 24. maj 2007 godine

SADRŽAJ:

MIŠLJENJE REVIZORA.....	2
1. UVOD.....	3
2. PREDSTAVLJANJE POLITIČKE STRANKE.....	3
3. OPIS REVIZIJE.....	4
Predmet revizije.....	3
Cilj revizije.....	4
Obim revizije.....	4
4. PRETHODNE REVIZIJE.....	4
5. NALAZI I PREPORUKE.....	4
5.1. NALAZI.....	4
5.2. PREPORUKE.....	5

MIŠLJENJE REVIZORA

- 1.1. Služba za reviziju finansijskog poslovanja u Centralnoj izbornoj komisiji Bosne i Hercegovine izvršila je reviziju godišnjeg finansijskog izvještaja za 2005. godinu **Evropske ekološke stranke**. Revizija je ispitivala primjenu Zakona o finansiranju političkih stranaka, od strane E-5.
- 1.2. Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.
Naša odgovornost je da izrazimo mišljenje na osnovu revizije koju smo izvršili.
- 1.3. Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka.
- 1.4. Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja, usaglašenost sa Zakonom o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Utvdili smo da Evropska ekološka stranka nije u izvještajnom periodu postupila u skladu sa odredbama člana 5. stav 1., člana 6. i člana 11. stav 3. Zakona o finansiranju političkih stranaka.

Prema našem mišljenju, osim navedenog, revidirani finansijski izvještaji ukazuju da je Evropska ekološka stranka u 2005. godini postupala u skladu sa Zakonom o finansiranju političkih stranaka.

1. UVOD

Služba za reviziju finansijskog poslovanja u Centralnoj izbornoj komisiji BiH je izvršila reviziju godišnjeg finansijskog izvještaja Evropske ekološke stranke za 2005. godinu.

Revizija je preduzeta u skladu sa članom 14. stav 1. Zakona o finansiranju političkih stranaka i članom 24. Pravilnika o godišnjim finansijskim izvještajima političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja E-5 je iskazala ukupne prihode u iznosu od 77.656,02 KM, čija struktura je data u sljedećoj tabeli:

Red.br.	Vrsta prihoda	Iznos u KM	Učešće u Uk.prih. %
1	Članarina	0,00	0,00%
2	Prilozi fizičkih lica	0,00	0,00%
3	Prilozi pravnih lica	6.872,02	8,85%
4	Prihodi od imovine	0,00	0,00%
5	Prihodi od pr.lica	0,00	0,00%
6	Prihodi od poklona	0,00	0,00%
7	Prihodi iz budžeta	70.786,00	91,15%
8	Ostali prihodi	0,00	0,00%
	Ukupni prihodi:	77.656,02	100,00

U godišnjem finansijskom izvještaju politička stranka je iskazala ukupne rashode u iznosu od 86.840,78 KM.

2. PREDSTAVLJANJE POLITIČKE STRANKE

Naziv političke stranke: Evropska ekološka stranka. Skraćeni naziv stranke je E-5.

Politička stranka je registrovana 24.04.2002. godine u Kantonalnom sudu u Sarajevu, broj upisa R-I-5/02 pod nazivom Proeuropska narodna stranka. Rješenjem broj R-I-3/04 od 15.04.2004. godine politička stranka je promijenila naziv u E-5- Evropska ekološka stranka.

Sjedište političke stranke je u Sarajevu, ulica Maršala Tita 9A.

Lica ovlaštena za zastupanje stranke: Nermin Vila, predsjednik,
Branislav Nedović, podpredsjednik,
Mirjana Palavra, podpredsjednik
Gradimir Gojer, generalni sekretar,
Alma Kalimanović, direktor.

Lice ovlašteno za podnošenje finansijskih izvještaja za 2005. godinu je Mirela Hamdović.

Organizacionu strukturu E-5 čine:

- Glavni odbor
- 5 regionalnih odbora
- 45 opštinskih odbora.

3. OPIS REVIZIJE

Predmet revizije su godišnji finansijski izvještaj E-5 za 2005. godinu i to sljedećih organizacionih dijelova:

- Centrale E-5 Sarajevo;
- Opštinskog odbora E-5 Jablanica;
- Regionalnog odbora E-5 Sarajevo.

Cilj revizije je da revizoru omogući da izrazi mišljenje o tome da li je E-5 u izvještajnom periodu postupala u skladu sa odredbama Zakona o finansiranju političkih stranaka.

Obim revizije finansijskih izvještaja E-5 obuhvata utvrđivanje usklađenosti finansijskih transakcija političke stranke sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta, priloge fizičkih i pravnih lica i prihode od imovine.

4. PRETHODNE REVIZIJE

Revizija finansijskih izvještaja E-5 obavlja se prvi put.

5. NALAZI I PREPORUKE

5.1. NALAZI

- a) **Na osnovu obavljene revizije utvrđeno je da je Evropska ekološka stranka prekršila odredbe člana 5. stav 1. Zakona o finansiranju političkih stranaka.¹**

Centrala E-5 je dana 15.08.2005. godine primila prilog od Hisingens Industri Skeppservice, Švedska u iznosu od 4.870,02 KM², čime su prekršene odredbe člana 5. stav 1. Zakona o finansiranju političkih stranaka u iznosu od 566,02 KM.

- b) **Na osnovu obavljene revizije utvrđeno je da se E-5 nije finansirala u skladu sa odredbama člana 6. Zakona o finansiranju političkih stranaka jer nije prijavila pojedinačne priloge fizičkih i pravnih lica čiji ukupan iznos premašuje 100,00 KM.³**

Evropska ekološka stranka nije prijavila prilog preduzeća „Dubrava“ d.o.o. Cazin u iznosu od 2.000,00 KM. Sredstva su primljena na transakcijski račun Centrale E-5 dana 11.05.2005. godine i evidentirana u poslovnim knjigama kao primljeni avans.

¹ Ukupan iznos jednokratnog priloga pravnih i fizičkih lica ne smije da premaši osam prosječnih neto plata prema zvaničnim podacima Agencije za statistiku Bosne i Hercegovine u jednoj kalendarskoj godini i ne smije da se dodjeljuje više od jednom godišnje. Prema podacima Agencije za statistiku BiH osam (8) prosječnih neto plata u 2004. godini iznosi 4.304,00 KM.

² Izvod transakcijskog računa u ABS banci br. 103 od 15.08.2005.

³ Ako ukupan iznos priloga jednog pravnog ili fizičkog lica premašuje 100 KM, ta uplata mora da se unese u finansijski izvještaj u skladu sa članom 11.

c) Na osnovu obavljene revizije finansijskih izvještaja utvrđeno je da je E-5 postupala u suprotnosti sa odredbama člana 11. stav 3. Zakona o finansiranju političkih stranaka.⁴

Evropska ekološka stranka finansijske izvještaje nije popunila u skladu sa Pravilnikom o godišnjim finansijskim izvještajima političkih stranaka.

- Na obrascu prihoda iz budžeta pogrešno su iskazana sredstva u iznosu od 1.000,00 KM uplaćena sa računa Ministarstva finansija i trezora BiH. Radi se o povratu takse za ovjeru političke stranke za Izbore 2004. godine.
- Obaveze po osnovu pozajmica, kredita i dugova nisu iskazane u finansijskom izvještaju u skladu sa članom 23. Pravilnika⁵. Na obrascu su iskazane obaveze po osnovu pozajmica u iznosu od 50.000,00 KM, od čega se 48.000,00 KM odnosi na pozajmice fizičkih lica, a 2.000,00 KM je pozajmica pravnog subjekta „Sjemecop“ d.o.o.⁶ Revizijom je utvrđeno da E-5 ima obaveze prema fizičkim licima po osnovu pozajmica u iznosima od 25.000,00 KM i 23.000,00 KM, dok je na obrascu 5. finansijskih izvještaja iskazana obaveza po osnovu pozajmice prema jednom fizičkom lica u iznosu od 48.000,00 KM. Obaveze po osnovu pozajmica su stvorene i knjigovodstveno evidentirane ranijih godina, a na osnovu Ugovora o komisionoj pozajmici⁷.

Obaveze prema dobavljačima nisu iskazane u finansijskom izvještaju. Prema podacima iz glavne knjige obaveze na dan 31.12.2005. godine iznose 46.044,93 KM.

Na osnovu obavljene revizije finansijskih izvještaja Centrale i odbora političke stranke utvrđeno je da se, osim navedenog, E-5 finansirala u skladu sa odredbama Zakona o finansiranju političkih stranaka.

5.2. PREPORUKE :

Na osnovu uočenih nedostataka preporučuje se Evropskoj ekološkoj stranci:

- *da postupa u skladu sa odredbama člana 5. stav 1., član 6. i član 11. stav 3. Zakona o finansiranju političkih stranaka;*
- *da definiše postupke i procedure internih kontrola vezanih za proces trošenja finansijskih sredstava,⁸*
- *da ustroji upravljanje gotovinom putem blagajne i uvede obavezu vođenja blagajničkih izvještaja na dnevnom nivou uz obavezne priloge (nalog uplate i nalog isplate; dokumenta na osnovu kojih se vrše isplate putem blagajne). Poslovanje blagajne treba urediti tako da se*

⁴Politička stranka je obavezna da Centralnoj izbornoj komisiji Bosne i Hercegovine podnosi finansijske izvještaje na obrascima koje je odobrila Centralna izborna komisija BiH.

⁵ U obrazac 5. se unose podaci o ukupnim obavezama po kreditima i pozajmicama (naziv davaoca kredita ili pozajmice, iznos, datum realizacije, visina rate i rok vraćanja) i obaveze po dugovanjima (naziv povjerioca, iznos duga, datum nastanka duga, visina rate i rok vraćanja duga).

⁶ Izvod br. 110 od 30.08.2005. godine.

⁷ Ugovori broj: 1491-03/02 od 23.08.2002. i 1544-03/02 od 03.09.2002. godine; rok otplate 12 mjeseci.

⁸ Uvidom u dokumentaciju odbora čiji su izvještaji bili predmet revizije utvrđeno je da računi nisu odobreni za plaćanje. Iz blagajne je izvršeno plaćanje računa za ugostiteljske usluge Ćevabdžinica „Hodžić“ u iznosu od 550,00 KM (blagajnički izvještaj za decembar 2005, nalog broj.126) bez prethodne ovjere, kao i Ugovora o autorskom djelu u iznosu od 700,00 KM (blagajnički izvještaj za april 2005, nalog broj. 25)

*razgraniče dužnosti odobravanja isplate, evidentiranja i isplate gotovine uz prethodno definisanje visine blagajničkog maksimuma;*⁹

- *da, u što kraćem roku, utvrdi i knjigovodstveno evidentira stvarno stanje svojih obaveza;*¹⁰
- *da uspostavi centralni registar članova.*

KOMENTAR:

U ostavljenom roku, Evropska ekološka stranka se nije očitovala na Preliminarni izvještaj o reviziji godišnjeg finansijskog izvještaja za 2005.godinu.

Ističemo da smo tokom obavljanja revizije imali dobru i korektnu saradnju sa osobom ovlaštenom za finansijske izvještaje Evropske ekološke stranke.

Hasida Gušić, šef Službe

Sanja Čabrilo, revizor

Semin Ramović, pomoćnik revizora

⁹ Blagajnički izvještaji centrale E-5 su sačinjeni na mjesečnom nivou.

¹⁰ Popis obaveza prema dobavljačima nije vršen. Strukturu obaveza prema dobavljačima nije moguće utvrditi jer se u poslovnim knjigama ne vode pravilno (na kontu dobavljača, a ne analitički po dobavljačima). U dokumentaciji ne posjeduju ugovore o pozajmici sa d.o.o. „Sjemekop“ i sa fizičkim licima. Ugovori o komisionoj pozajmici su sklopljeni između E-5, fizičkih lica i ABS banke. Obzirom da E-5 nije u ugovorenom roku vratila pozajmice banci, novčana sredstva su, shodno ugovoru, sa računa fizičkih lica (koja su bila obezbjeđenje za pozajmice) vraćena banci. Tako su navedena fizička lica postala povjerioci za pozajmice koje su evidentirane u poslovnim knjigama stranke. Tokom obavljanja revizije utvrđeno je da stranka nema sklopljene ugovore o pozajmicama sa ovim licima.